

Werk

Titel: XVI. De ceu meismes ke dauant

Ort: Erlangen

Jahr: 1886

PURL: https://resolver.sub.uni-goettingen.de/purl?345572629_0002|log23

Kontakt/Contact

Digizeitschriften e.V.
SUB Göttingen
Platz der Göttinger Sieben 1
37073 Göttingen

✉ info@digizeitschriften.de

ment mon desier. Et certes li uisitemenz et li araisnemenz ke li engele fisent as pastors acrast assi mon solaz. VVai a uos riche homme ki auez uostre solaz *per* cuy uos desseruiz ke uos nen aiez lo celestien. Hay quante noble gent selonc la char. et quant poissant homme. 5 quant saige homme de cest seule gesiuent dons a cele hore en lor molz leiz. et nuls d'ols ne fut dignes de ueoir cele nouele lumiere. ne de sauoir cele grant ioie: ne k'il oiessent les engeles chanteir gloire soit a deu en haltismes. Saichent bien li homme. ke cil ne deseruent mies qu'il aient lo uisitement des engeles: ki ne sunt en la 10 labor des hommes. Saichent cum forment placet as citains de ciel li labors cuy om fait *per* espiritel intencion. quant il ceos mismes dignent araisnier *per* si bienaurous araisnement ki laborent por lor corporel necessiteit. Il conoissent en ols l'umain ordene ke deus estaulit: ke li hom mainiast son pain en la suor de son uis. 6. Or esuardiez dilian- 15 trement chier freire cum grant chose deus fist por uostre enortement et por uostre salueteit. ensi k'en uos ne soit [57^v] mies atroueie senz fruit si uiue parole et plaine de si grant uertuit. parole si feaule et digne k'ele de totes parz soit receue. parole ne mies tant de boche cum d'oyure. Cuidiez uos chier freire ke poc me deust greueir si ie 20 sauoie ke ceste parole ke iu or parole a uos duist perir en uoz cuers ensi k'ele remanust uaine et senz exploit? Et ki suys iu ou quels est ceste meie parole? Si uns hom poures et chaitis et ki est ausi cum uns nianz aueroit dolor si ses tres peterines trauals estoit a uos senz exploit. cum plus a droit se correceerat a uos li sires de maiesteit si 25 uostre durece ou uostre negligence aniantist les seies oyures? Mais ceu ocet de ses serianz cil ki por lor salueteit daignat uestir la forme del serf Ihesu Criz li filz de deu ki est sor totes choses benoiz senz fin. Amen.

XVI.

30

De ceu meismes ke dauant.

In natiuitate domini sermo IV.

(Migne p. 126.)

1. Reconisseiz chier freire cum granz soit li sollempniteiz qui ui est. Ale est alargie et de leu et de tens: a cuy est bries li iors et li 35 ampleteiz de la terre estreite. La nuit porprent. lo ciel raemplist anzois ke la terre. Ceste fut enlumineie si cum iors. quant a l'ore de meie nuit resplandiat entre les pastors li nouele lumiere de ciel. Mais por ceu ke uos sachiez en quel leu om encomenzat primiers a celebrer

les ioies de ceste sollempniteit: si anoncet om ke cele ioye douoit uenir a tot lo peule. ke iai estoit as engeles. car apermenmes uint li oz de la celestiene multitude chantanz et loanz deu. De ceu est c'um trespesset ceste nuit plus sollempnement de totes les autres en salmes et en ymes et en chans esperitels. et croire doit om senz dottance ke 5 cist celestien prince da[58^r]uancent maismement en cez uigiles ceos ki el los de deu se deleitent. Mais ke cuidiez uos quant alteit soient ui per lo monde ki resplandient d'or et de gemmes et quantes paroiz aorneies de pailles? Cuydiez uos ke lai se doient torneir li engele et leuer les pources hommes? S'ensi est por kai aparurent il dons anzois as 10 pastors des berbiz k'il ne fesissent as rois de la terre nen as prestes del temple? Et por kai dedieroit li salueires mismes en son cors la sainte pouerteit ki est sires et creeires et de l'or et de l'argent? Ou por kai reconteroit si cusencenousement la pouerteit de l'enfant cui neissance il anoncieuet? Ne ceu mismes nen est mies senz espiritel signi- 15 fichance. c'um l'enuoloppet en dras et c'um lo mat en la mainiure. quant li engeles mismes donat a nos auuertement cez choses por ensaignes. A cez ensaignes dist il as pastors. ke uos atrouerez l'enfant enuolepeit en dras et mis en la mainiure. En ensaigne sunt mis tei drap chier sire Ihesu. mais en ensaigne a cui 20 mainte gent restunt eniosk'a ui de cest ior. car molt i at de ceos ki sunt apeleit: et poc de ceos qui sunt esleit. et por ceu i at molt de ceos ki saigniet ne sunt mies. Certes bien sai ki cil granz prestes fut ki uestiz estoit de laides uestures endementres k'il al diaule se combatoit. Iu parole a gent qui les escritures seuent. et ki ont leit la 25 uision Zacarie la profete. Lai ou nostre chies fut essauciez sor noz anemins. lai muat il urayement sa uesture et si se uestit de beateit couerz de lumiere si cum de uestiment. Example nos donat. por ceu ke nos faciens assi ceu mismes. Certes molt est plus utles en la bataille li haberz qui de fer est. ke ne soit li uesture de lin: iai soit 30 ceu ke cil soit [58^v] pesanz et cele honoraule. Ci apres uenrat li tens quant li membre enseurent lo chief: ke toz li cors se deleiterat en un esprit et si dirat. Detrenchiet as mon sac: et si m'as uestit de leece. 2. Vos atrouerez dist il l'enfant enuolepeit de dras et mis en la mainiure. Et dons uinrent ce dist un petit apres 35 li euuangelistes hastanment: et si atrouarent Marie et Ioseph et l'enfant mis en la mainiure. K'est ceu ke li engeles nen anoncet mais ke la sole humiliteit. et li pastor ne l'atrueuent mies sole? Plus specialment per auenture loet li engeles la uertuit d'umiliteit. por ceu qu'il en humiliteit permanut quant li altre trabucharent per orgoil. 40 Ou por ceu fut anoncieie de ciel li humiliteit: ke ceste est assi cum

li propre uertuz cui li cuers doit representeir dauant deu. Toteuoies ne polt mies estre sole atroueie: car a ceos ki humle sunt est ades doneye li grace. Il atrouerent dist il Marie et Ioseph: et l'enfant mis en la maingeure. car ensi cum li enfance del saluaor mostret auuertement la uertuit d'umiliteit: ensi entent om *per* la uirgine la uertuit de continence. et *per* lo iuste Ioseph cui li euuangelistes loet la uertuit de iustise. La continence si cum tuit seyuent bien doit om a la char. et la uertuit de iustise k'a un chascun rent ceu ke sien est: doit om as prosmes. mais li uertuz d'umiliteit nos reconciliet a deu et si
10 nos fait sozgeiz a lui: et molt li plaist en nos. si cum dist li bienaureie uirgine. Deus dist ele at resuuardeit l'umiliteit de son ancele. Donkes cil ki fornication [59^r] fait pechet en son cors. et cil ki torturiers est pechet en son prosme. et cil ki s'orgoillet pechet en deu. Cil ki fornication fait deshonestet lui mismes. cil ki torturiers
15 est fait greuance a son prosme. et cil qui orguillous est deshonet deu en lui. Iu ne donrai mies a altrui ma glore ce dist nostre sires. Et li orguillous dist. Ancor ne la me doignes tu mies: si la penrai iu a force. Ne li diuise de l'engele ne li plaist mies: ki a deu donet la glore: et as hommes la paix. Fel est urayement et non-feaules
20 cil ki tels est. car il nen ainmet mies nostre signor et se dracet encontre luy. Et quel altre pitiez puet estre mais ke deu seruir *per* amor? Et ki est ki en teil maniere lo sert se cil non ki de uolenteit li est sozgeiz. et ki ensi at les oylz de son cuer a luy si cum li oyl des serianz sunt ens mains de lor signors? 3. Viuons donkes sobre-
25 ment. piement. et iustement en cest seule: por ceu c'um atrocet ades en nos Marie et Ioseph et l'enfant mis en la mainiure. car por ceu aparuit li grace de deu ke nos ensaignet et aprent: et por ceu assi apparat sa glore. et ensi lo dist li apostles. Li grace de deu dist il est apparue a toz les hommes. et si nos ensaignet ke nos
30 renoyens tote maluestiet et les seculers desiers: et ke nos sobrement et piement et iustement uiuiens en cest seule. et si atendiens la bienaureie esperance: et l'auenement de la glore de deu. El petit enfant apparuit li grace por nos a ensaignier. mais cist serat granz si cum dist Gabriel ki de ciel uint
35 et ceos cuy li petiz enfes auerat apris humiliteit de cuer a auoir [59^v] et mansuetume: ceos magnifierat il ci apres et glorifierat quant il uenrat granz et glorious. Ihesu Criz nostre sires: qui est deus benoiz sor totes choses Amen.